

Durian Tunggal dilanda banjir



Beberapa rumah penduduk di Kampung Bukit Balai dinaiki air, semalam.

DURIAN TUNGGAL - Hujan lebat berpanjangan lebih tiga jam mengakibatkan kira-kira 50 penduduk daripada 12 keluarga di kawasan Durian Tunggal dipindahkan di tiga pusat pemindahan banjir, di sini, semalam.

Hujan bermula kira-kira 10.30 malam kelmarin sehingga awal pagi semalam menyebabkan tiga kawasan dalam Dun Durian Tunggal terjejas, melibatkan 33 penduduk di Bukit Balai, 10 penduduk di Kampung Padang Kerbau dan selebihnya di Kampung Pulau.

Penghulu Dun Durian Tunggal, Mohd Marhakim Hasan berkata, sebuah keluarga di Bukit Balai dipindahkan seawal jam 3 pagi di Balai Raya Bukit Balai se-

belum pusat pemindahan di Surau Kampung Padang Kerbau dan Balai Raya Kampung Pulau dibuka kira-kira jam 6 pagi untuk menempatkan mangsa terlibat.

"Hujan dalam tempoh yang panjang menyebabkan air longkang penuh dan melimpah sehinggakan rumah penduduk dinaiki air terutama di kawasan rendah dan berhampiran sungai.

"Bagaimanapun, tiada kemalangan jiwa berlaku. Kesemua mangsa masih ditempatkan di pusat pemindahan dan dijangka dibenarkan pulang setelah keadaan kembali pulih," katanya.

Marhakim berkata, Jabatan Kebajikan Masyarakat (JKM) Daerah Alor Gajah dan Majlis Keselamatan Negara (MKN) su-

dah memberikan bantuan awal kepada mangsa.

Pengarah Jabatan Pertahanan Awam (JPAM) Melaka, Lt Kol (PA) Effendy Ali berkata, empat anggotanya ditugaskan ke lokasi banjir bagi memindahkan kira-kira 13 orang di Kampung Bukit Tambun dan seorang warga emas di Kampung Pulau Durian Tunggal.

Menurutnya, mangsa di Kampung Bukit Balai pula berpindah sendiri ke pusat pemindahan.

"Kita turut menempatkan dua anggota di Pusat Pemindahan Banjir Bukit Balai bagi memastikan keselamatan nyawa dan harta benda orang awam terus selamat," katanya.